



閩南語現代詩 社會組第三名

轉去故鄉的時陣——元宵暝

一 空炮仔架

是束綁 是圈禁
是沓沓仔親像一隻載阮出逃的帆船
阿爸講的話
越頭看無厝內底
秋風是軟弱的樹樞
阮是海風仔微微吹
望月娘來走揣——
彼暝 我佇月津港
街燈綴阮覘相揣

二 搭蜂仔架

一隻兩隻白鴿驚
一个一个水窟仔內唸歌詩
細漢時陣每一工
輕輕搖 趕緊睏
乖乖惜 阿母等
攏無一人佇身邊
寒冬是漏雨的厝尾頂
伊是海風仔陣陣吹
日頭跋落去海底——
彼暝 我佇月津港
天星掠我金金看

三 引信

一岫一岫蜂仔
勻勻仔浮出親切的形影
猶原是大廳內彼張相片
阿公擔著彎曲的過去
濕澹菜園有阿媽的跣印
阿爸胸坎像大海
撥開雲霧是阿母微笑的眼神
月津港的風真透
阮是路邊的麻黃 固執毋管海湧不時來安搭
海風是直直吹——
彼暝 我佇月津港
蜂仔炮岫一直攏是阮的夢

四 裂紅紙

射出去 彈轉來
走佗位去 覘無所在
蜂仔滿天飛
記持像雨霎霎滴
往昔是竹排仔 風一吹
孤單引阮恬恬入港
一路搖一路犁
文衡聖帝接載每个性命的經過
一岫蜂仔邊
阮總算轉來故鄉土地——
彼暝 我佇月津港
看蜂仔炮規暝

作者感言



陳倚芬 自由作家（筆名：跳舞鯨魚）

異鄉遊子親像是一枝一枝蜂仔，直直飛，最終飛去佢位，猶原是，故鄉內一岫岫蜂仔炮城，永遠毋管空虛寂寞的日子如海湧一波一波濕澹著等待的夢……終有一日，遊子會回航。感謝我的故鄉——月津（鹽水）。感謝勉勵我寫出故鄉故事的朋友。感謝如燈塔引阮行過孤單風雨，親像故鄉長輩的神明文衡聖帝，一直攏佇武廟內，金金看著每一個離鄉打拼的囡仔。